



624



唐丞相曲江張先生文集



四



Inches 1 2 3 4 5 6 7 8
Centimetres 1 2 3 4 5 6 7 8 9 10 11 12 13 14 15 16 17 18 19

Blue Cyan Green Yellow Red Magenta White 3/Color Black

TIFFEN Color Control Patches © The Tiffen Company, 2007



唐丞相曲江張先生文集卷之十七

序銘文

王少府東閣序

益州長史叔置酒宴別

送密縣高贊府序

登薛公道遙臺序

開鑿大庾嶺路序

魏山公蘇詵銘

餞宋司馬序

送幽州王長史赴軍序

幸司馬別業集

別韋侍御使蜀序

獅子贊序

鷹鷂圖贊序

畫天尊像銘并序

尚書裴公畫贊并序

宋使君真贊并序

惠莊太子哀冊文并序

祭舜廟

為吏部侍郎祭故人文

祭故李常侍文

祭洪州城隍神文

祭王司馬妻父文

為王司馬祭甄都督文

祭張燕公文

追贈祭文

陪王司馬宴王少府東閣序

夫道行與廢命也非謀之不臧命通與塞時也豈力之為弊古之君子推其分養其和仲尼得之以絃歌傳說因之以板築至若詩有怨刺之作騷有愁思之文求之微言匪云大雅王六官志其大者司馬公引而申之謫居何心不欲賈生之投弔窮愁非我安用

虞卿之著書嘗以風月在懷江山為事簿領何廢形勝不辜既好樂而無荒亦上同而不混迨乎倚層閣憑華軒川澤清明上懸秋景峯嶺迴合下帶溪流聯草樹而心搖際煙氛而目盡茲邦枕倚是日登臨豈子虛之過詭誠仲宣之信美物色起殊鄉之感誰則無情而道術得異人之資吾方有適於是旨酒時獻清談間發歌滄浪以放言詠蟋蟀而傷儉蓋古人之作者豈異於斯盍賦詩以揚其美

益州長史叔置酒宴別序

天子建五長守四方內以承衛京師外以攘却夷狄

則有持貝節制未十年而歷踐撫其封疆既一行而
寧輯盡在我叔父備聞于朝廷昔者吉甫是欽仲著
孝友之德楚子所畏趨在諸侯之選世有實績今以
美濟俾我張氏鬱彼士林以媚于一人以正于四國
豈非德能燁謀必變通思古人之獲心施君子之不
器所以前拜小司馬兼擁旄於五涼再命左常侍仍
總戎於三蜀軌模素遠綽有先路之風聲車服載馳
光被上軍之禮命莫不文茵暢轂淑旂綏章嘽嘽皇
皇途將出於華陽威已疊乎夜郎是時也四序鱗次
屬當春夏之交千里草長有懷原隰之往乃闢軒宇

邀賓寮自髦士而及同姓由金華而下建禮或交以
道合豈徒隸好之風或情以族親所謂宗盟之義龜
組交映肴敕駢羅而聲欲成文發中堂之絃管志在
擊節感四座之衣冠必名義而爲言雖聚散而何有
酒酣相顧驪歌乃作白日西下缺壯士之翻車青山
南登愛忠臣之叱馭凡我明懿賦詩餞行

景龍觀山亭集送密縣高贊府序

景龍東山初主第一也始其置金榜築鳳臺窮土木
之功極崗巒之勢議與盤石同體造化較力何其壯
哉自吾君茅茨不剪采掾不斲既抑華而務實將設

教以垂範以故平陽化焉罷歌舞於其地麻姑見者
變桑田於此時所謂長女之宮鬱爲列仙之館其後
嘗有好事以爲勝遊今日芳辰携手接袂往往餽祇
取樂焉高十官雌伏都畿星言至止聞殊庭之可尚
召嘉客以相歡徒觀其匠幽奇宅爽塏十里九版豈
惟梁氏之作千巖萬壑宛是吳中之事青林脩聳而
垂綵綠蘿蒙籠以結陰清流若鏡下照金沙之底雜
花如錦傍綠石茵之崖則可以藻飾形神揮斥氛滓
相顧風塵之表無負雲霄之槩旣而東主西賓酒酣
樂闋聚必有散匪伊麋鹿之群往而不返固亦山林之

弊高公乃振衣而起舉盃有屬却計送人出長安之
東道退思征馬向洛陽之南阡雖暫勞於州縣迫如
簿領方欲厭於承明資其騫躍夫如是相知意氣何
恨此離盃賦詩焉以贈行者

歲除陪王司馬登薛公道遙臺序

故郡城有荒臺焉雖層宇落構而遺制巋然邑老相
傳斯則薛公道衡之所憇也薛公不容隋季出守海
隅豈作臺榭以崇奢蓋因丘陵而視遠必有以清滌
孤憤舒嘯佳辰寄文翰以相宣仰風流而未泯今司
馬公英達好古清譽滿時迹有忤於貴臣道未行於

明主以長沙下國同賈誼之謫居六安遠郡無桓譚
之不樂嘗以爲仁不異遠必敷政以愛人窮當益堅
已坦懷而樂地屬府庭閑暇江浦清明南土陽和覺
寒氛之向盡東郊候暖愛春色之先來於是命輕舸
以乘流趣高臺而降望越荒堞披古道躋隱嶙而三
休俯芊綿而四極其遠則煙連井墟指甌貉以南馳
雲合山川距荆吳而北走其近則深谿見底鱗介之
所出沒喬林夾岸羽毛之所翱翔悠哉薛公無不寄
也意神期之可接陟彼峻隅想風景之不殊前爲茂
草司馬公又以爲峴山故事感羊祜以興言湘水遺

風懷屈原而可作况登高能賦得無述焉其實小人
受教君子雖義之樂會稽之士自與許詢而仲舉禮
豫章之人復招徐孺是日也群英在焉猥惟陋才忝
陪下列祇命爲序請各言詩

開鑿大庾嶺路序

先天二載龍集癸丑我皇帝御宇之明年也理內及
外窮幽極遠日月普燭舟車運行無不求其所寧易
其所弊者也初嶺東廢路人苦峻極行逕寅緣數里
重林之表飛梁礫嶺千丈層崖之半顛躋用惕斬絕
其元故以載則曾不容軌以運則負之以背而海外

諸國日以通商齒革羽毛之殷魚鹽蜃蛤之利上足以備府庫之用下足以贍江淮之求而越人綿力薄材夫負妻戴勞亦久矣不虞一朝而見恤者也不有聖政其何以臻茲乎開元四載冬十有一月俾使臣左拾遺內供奉張九齡飲冰載懷執藝是度緣磴道披灌叢相其山谷之宜革其坂險之故歲已農隙人斯子來役匪逾時成者不日則已坦坦而方五軌闐闐而走四通轉輸以之化勞高深爲之失險於是乎鑄耳貫胃之類殊琛絕費之人有宿有息如京如坻寧與夫越裳白雉之時尉佗翠鳥之獻語重九譯數

上千雙若斯而已哉凡趣徒役者聚而議曰慮始者功百而變常樂成者利十而易業一隅何幸二者盡就况啓而未通通而未有斯事而盛皆我國家玄澤寢遠絕垠胥泊古所不載寧可默而無述也盍刊石立紀以貽來裔是以追之琢之樹之不朽

給事中魏山公蘇詵題而銘曰

石歲嵬兮山崖崖嶽峯峯峯兮相蔽虧槎岬岬兮莽芊芊噫茲路兮不記年大聖作兮萬物覩惠吾人兮道復古役斯來兮力其成石旣攻兮山可平懷荒服兮走上京遷商兮重九譯車屯軌兮馬齊跡招孔翠

兮俸齒革伊使臣之光兮將永永而無斁

餞宋司馬序

宋司馬才通命塞雲翼泥蟠終窟朔方不廢琴書之業賈誼宣室欲言鬼神之事既而出宿南浦及鴻鴈以同歸追餞北梁對丘山而不樂是日渚雲欲霽林鳥將春惜時物之方華重人情之自遠群公有感中座無歡他日清風自當玄度之夕茲辰零雨得無子荆之詠遂相與援翰賦詩贈行

送幽州王長史赴軍序

漁陽我之巨鎮也慎憚軍佐敷求國良以王公能有

命汝徃底其耕戰之事介于將吏之間則已聲藉天
庭氣雄潏碣鷹揚有日馬首欲東自名卿大夫與時
髦懿士莫不激其節而重其邁結軫連袂携壺抱琴
留飲極於郊岐望美延於朔裔者不可勝數仲月暄
矣陽時賁若植物之發芳香行人之感意氣不日群
萃豈懷安於鹿豕不日垂堂已載馳於原隰孰不知
西笑之美况伊歲華東征之勤兼彼戎旅蓋樂不遑
舍君人之所難義不顧私志士之為用今之作者聞
而休之各賦詩一章以志其善也

韋司馬別業集序

杜城南曲斯近郊之美者也背原面川前峙太一清
渠脩竹左並宜春山霞下連谿氣中絕此皆節公之
有也余固已聞之開元歲夏四月猥忝散職居多放
情跂彼一行無忘於夙尚時其七召果獲於前期廼
與起居舍人蔡公萬年主簿韓公惠而得朋欣然命
駕韋公方拭席見待羞以藥物之滋倚琴相歡雜以
嘯歌之韻清言移景閑步周林翻飛自情俯仰爲得
斯亦吾儕之樂事幸可而同也扶陽餘慶磻溪古跡
樹留梓漆器用天成庭澣芝蘭馨香世襲斯乃韋氏
之懿業是所爲異焉而韋公尚其同之樂亡其異之

貴均林棲於服冕齊鼎食於榮枯彼未可量吾見其
大跡繼前軌將爲龍以爲光道包遠圖豈一丘而一
壑二三君子相與志之云

別韋侍御使蜀序

子之友曰韋侯始以才進中而遇坎自廷尉評爲益
州刺史行欲美也玉映而山輝善無小也鶴鳴而天
聽俄自謫宦假其察視奮飛泥蟠皇華原隰爲持斧
之吏受負弩之禮非其明義清節高邁卓絕時輩所
美朝義推多亦焉得利其徃蹇而振其廢滯而今而
後子有以見舉德之輜爲神之介雖不本於利而終

享其實者有矣夫火才暑徂使車云邁心同道合旨
酒有饒或席次林園或觴臨郊岐風流相從日夕以
繼者於若人如此其厚也僉以爲無欲而自致韋子
之謂道有善而不揚友朋之爲過然則今之所至莫
近於詩盍賦一章以美吾友故有斯作也

獅子贊序

夫德之所感者深物之所懷者遠中國有聖占候而
自來四夷不王征伐而難致故絕域有來貢沒與諸
侯有不入苞茅舉其大允不在遐邇頃有至自南海
厥繇西極獻其方物而獅子在焉爾雅所謂後狨如

越猫食虎豹今之所見信然絕猛者也其天骨雄詭
材力傑異得金精之剛爲毛羣之特伉立不動而九
牛相去眈視且瞋則百獸皆伏所以肉視犀象孩撫
熊羆其餘瑣細不置牙齒我天子示柔遠之義國無
不庭有服猛之威物無難制故其受羈絏伏閑皂時
馴而無用鋒莫可當然吾君所存義不謂此蓋蠻夷
君長歲時貢獻或殊賅絕費實於內府或異獸奇禽
擾於外囿皆其覲禮若中國之贄幣所不辭讓明異
方之臣妾此則非有利物之心充耳目之翫好以爲
懷柔之道示天地之含容不其然歟固無德而稱也

義異大大豈勞召公之訓美同赤豹何闕韓侯之詩
凡我侍臣爲之贊曰

鷹鵠圖贊序

鳥之鷲者曰鷹曰鵠鷹也名揚於尚父義見於詩鵠
也迹隱於古人史闕其載豈昔之多識物亦有遺將
今而嘉生材無不出爲所呼之變與所記不同者耶
然於羽族之中絕有豪傑之表氣感剛悍體侔銛鋒
顧視之間煒如也夫受以勁翮意不群飛資其利嘴
義在鮮食生有自然之權用無可抑之勢古之言武
士法吏齊名比義者以其嚴若郅都飛若李廣委質

於所事報功於所養不憚摧翼以虧勇不立垂枝以
屈節是鳥也向之擬議不亦宜乎夫鸞與鳳將感於
仁所不及也鷄與鶴猶較其德被何有焉况其餘雖
飛雖鳴凡者恠者肉非登俎才非下講威力不敵群
噪無益然後知二禽之爲用衆鳥之絕倫者也故君
子躡其然工人圖其狀以象武備以彰才美雖未極
其天姿有以見其風骨矣昔支遁道林嘗養名馬自
云重其神駿斯圖也非彼人之徒歟

畫天尊像銘并序

畫天尊像者贈吏部侍郎武功蘇公太夫人崔氏爲

公卒哭之所作也蘇公有重名於時未大用而卒遭命不遂當代所悲况作嬪于公鞠凶在疚援詩以誓其節執禮而哭於晝哀而能感感而能通極希微而不見中恍惚其如在於是欲介景福將祈太清因心寓象命工設色飾金闕圖玉皇元天不遠真官在列飄若靈氣爛其神光彼昭厥誠允速其應斯所謂玄鑒無昧當受謁帝之符幽魂有憑必署昇仙之錄此固崔氏之至願也有足悲者豈不倚歎銘曰

至哉天京災劫不及上有靈府聖真所集彼美孟姜聞斯洞彰仙道貴度我君則亡猗歎我君蔚爲人傑

命屈金鉉神傳玉訣遊魂大素介福上清式圖元象永觀厥成

侍中兼吏部尚書裴公畫贊并序

元聖有作大賢將其命良弼有二侍中是其所從龍武實感風雲我之裴公道與上合義深體國策在忠主亦旣致於堯舜不惟比於管樂至於執人柄振天綱丹青帝圖金玉王度雖古之作合謂之有開未始聞也夫事可法道可度威可愛儀可象赫咺中來精英外發故工繪其事所以見盛德之形容士頌其功所以知和氣之導達五事曰貌一以作恭七聲成

文六乃為頌俾凡今之人也色斯而覩與聽之而知
理水有方折辨和氏之價焉山為具瞻表師君之重
焉贊曰

赫咄人望時為國紀偉量川溇高標嶽峙磊落成節
精明入理倬哉輔臣式是多士丹青炳發儼如至止

宋使君寫真圖贊并序

夫形者神明之表而動用之應也察之苟至則珠玉
雖蘊光輝必兆於山泉而眉睫可知賢達亦徵於骨
象如宋公之天姿森挺人望儼然一覩清陽不俟深
鑒是猶雞羣見鸛象齒如牛居然有差此其殊特者

也聲聞如彼風俗又爾寧有陳平之美更虞子羽之
色即雖妄庸之目素非知公之者偶見斯狀亦已明
其瑰異焉初公舉茂才歷長安尉三為御史再入尚
書郎色莊以立朝則百寮所憚言揚於伏奏則三臺
為表而竟以出守俄復從邊其故何哉由抗直之為
患也然公處屯而必行其道居陋而不改其度能貞
其節可謂君子哉才為國而生命有時而泰彼宋公
修志以俟也其復可立而須焉時有族兄曰之望者
亦賈生之謫居有顧君之畫絕偉公之貌作為是圖
意得神傳筆精形似因命僕為贊其美云

宋公卓犖體標山嶽匪石不移如玉斯琢被服忠信規模禮樂望之儼然允謂高貌

惠莊太子哀冊文并序

維開元二十年歲次甲子十二月丁巳朔二十四日庚辰司徒申王薨于行在所冊謚惠莊太子旋殯于寢奧閏十二月二十七日壬子將陪葬于橋林之栢城黻幕宵布羽纛宿設西序啓攢南首成列皇帝深天倫之戚崇后儲之禮擬容衛於青宮申孔懷于朱邱爰命史氏稽於令則無俾直書不彰遺德詞臣曰昊天有命先后受之分王子弟蕃衛京師克荷成憲

罔弗肅祗懿哉明哲誕惟神粹宣慈日聞孝友天至道則昭合迹無自異性則生知學兼時習易微書遠詩言禮立德必有隣善如不及貴而能損量固難挹方伯出鎮召南取斯司徒入掌鄭武其宜義之所在政乃克施物留遺愛事著成規西夏息人東征叶卜鞞鞞同輦皇皇改服疾邁中路凶傳左穀寧不愁遺奄鍾斯酷嗚呼哀哉昔在冲妙具惟兄弟四國並封五王均體遊必連騎居則同邸各承愛於含飴俱受經於置醴旣荏苒而云邁屬殷憂之將啓實定禍於蕭牆遂繼明於雲陛雖隔深宮之衛常洽家人之禮

曷殂謝以痛心感平生而流涕嗚呼哀哉爰擇茂典
追崇上嗣表先聖之元良申友于之褒異紛鹵簿以
徒設儼文物而空備彼神儀之如在乃群悲之所萃
周禮從祔漢塋是陪先遠日而選吉會同盟以送哀
夜漏盡兮暗室啓庭燎殘兮曉挽催按三校而徐進
將一去而不迴嗚呼哀哉肯朱門兮遲遲馳白驥兮
驟駭野蒼茫而助慘風蕭颯而增悲翩翩兮素蓋寂
寂兮畫帷導舊途而何有覽陳迹以如疑面都邑兮
不入侍陵寢兮有期惟光儀之永閔與昭代而長辭
嗚呼哀哉潛清揮於幽窆召鴻名於美跡將在皇儲

之史豈伊諸侯之策播遺芳於蘭桂傳不朽於金石
諒既言之在茲嘉德音之無斃嗚呼哀哉

祭舜廟

維某月朔日中散大夫使持節都督桂州諸軍事守
桂州刺史兼當管經畧使嶺南道按察使攝御史中
丞借紫金魚袋上柱國曲江縣開國男張某敢昭告
于大舜之靈惟神以大孝而崇德以大聖而奮庸以
至公而有天下以至均而一海內故不以荒服之外
不以黃屋之尊巡守而來殂落於此勤倦之造永結
於黎庶惠懷之尊長存於壽宮載祀雖遐威靈如在

今聖朝紹興至道愍茲遠人爰遣使臣按理邊俗惟神幽鑒願表微誠若私僻爲謀公忠有替明鑒是殛俾無遠圖如悉心在公惟力是視當福而不福爲善者懼矣今至止之日輒詣陳誠伏惟神道聰明亮斯欽到願俯垂冥祐俾輸力明時尚饗

爲吏部侍郎祭故人文

維開元十年歲次壬子二月癸酉朔十七日己丑吏部侍郎某謹以清酌脯醢之奠敬祭故某公之靈聞夫仁必壽考所謂神道善亦慶延以爲信然今夫子之不福而聖墓之是愆孝友純固禮讓周旋行所以

直業所以專誠公才而天假故官政以日宣節使是式朝宿旣至十部稱賢一人思媚鳳凰于彼雲霄以異胡然明靈殲我良懿嗚呼哀哉夫子之逝平生之懷襟抱素合遊處嘗偕清風對禁文石同儕自茲兩掖殆將一紀展轉清貫化離君子曷其愛而甫云觀止正司空之掃第屬荊州之罷市歛交臂而相失殷痛心其何已今卜兆有日祖載在庭颯然象設冥爾音形驅白馬而何見瞻素車之已病德音不忘應甘棠之勿剪交情乃見伊黍稷之非馨嗚呼哀哉尚饗

祭故李常侍文

維年月朔日中散大夫洪州都督張某謹遣倉曹參
軍李某以脯醢之奠祭于故宋國公之靈惟公世載
賢傑天資忠厚外珪組而雖華內水鏡而無垢善常
不伐明能自晦省中之樹訪猶不言車前之馬數而
後對淑慎自己不亨有時孰能違命公此來思結忠
主之戀深去國之悲六疾斯起五福云欺生涯溘盡
精魂何之嗚呼哀哉道惟曩昔昇降雲霄榮華侍從
曄曄光昭日歟月歟有榮有凋丹旆子牙白驥蕭蕭
同官之感俾余魂銷靈之來歸茲焉旅次瞻望無覩
悲辛自至頃密邇而寄音今冥然而結歎南北于遠

幽明永異何以叙情寄之奠饋尚饗

祭洪州城隍神文

維開元十五年歲次丁卯六月朔壬寅十日辛亥中
散大夫使持節都督洪州諸軍事洪州刺史上柱國
曲江縣開國男張某以清酌脯醢之奠祭于城隍神
之靈恭惟明神懿皆潛德城池是保民庶是依精靈
以秉正直攸好黍牧此郡敢忘在公道雖隔於幽明
事或同於表裏今水潦所降亦惟其時而淫雨不止
恐害嘉穀穀者人之所以爲命人者神之所以爲祀
祀可不以爲利義不可以不福闔境山川能致雲雨

豈無節制願達精誠以時弭災無或失稔則理人有
助是所望於神明尚饗

爲王司馬祭妻父文

維年月朔日謹具少牢清酌之奠祭于故某公府君
之靈惟公聯華公族振景天朝昔也時來則地分茅
上今也福過則海變桑田豈惟魑魅之憂方爲蠖蟻
之患嗚呼哀哉始更榮盛早睦嘉姻謬入郟公之選
嘗荷戴侯之遇情契闊而彌積義流離而益固公之
謫宦其又犯時水矣去國賁然來思雖窮途之至此
幸隣境之在茲所忌者法豈忘於私聞柝聲而密邇

畏簡書而間之然猶風煙可異翰墨無輟心已運於
虛舟跡尚濡於涸轍驟寒暑之徂謝紛吉凶之迴冗
京兆之使勿道廣陵之音遽絕嗚呼哀哉平生多感
自傷千里之心已矣長辭徒發九泉之歎計疇昔之
光寵痛淪亡於旅窳嘗許恤人之孤况霑愛子之牛
謹因遣奠昭告明靈心不可卷德以爲馨匪羞是薦
惟魂是聽遣行人於信宿空法目於郊垆嗚呼哀哉
尚饗

爲王司馬祭甄都督文

維開元五年歲次丁巳九月丁酉十四日庚戌官某

謹以清酌之奠祭于廣州都督甄公之靈惟公稟氣
異人爲國良臣資忠秉義奮翼躍鱗富貴自取聲名
益震故能北擁旄於玄朔南仗節於朱垠行部無幾
卧理斯屬棠陰在聽薤歌成曲下流是仰長塗反促
如望雨而隨車遽驚風而轉燭嗚呼哀哉甫茲歲首
彤檐載輝今也秋季丹旄言歸旣寒來而暑往將物
改而人非駟馬不馭雙鴈空飛對平生之氣象詠宿
昔之音徽燕越兮地眇胡山兮路微奠有觴之在席
感徒御以霑衣嗚呼哀哉尚饗

祭張燕公文


維年月朔日族子秘書少監集賢院學士某謹以清
酌少牢之奠敢昭告于燕國公之靈惟公應有期之
運降不世之英坦高軌以明道謹大節而立誠懸鏡
待人虛舟濟物妙用無數精心惟一明未朕而先覩
聽有餘而每黜猶豹變而成文嘗鳳鳴而中律故能
羽翼聖后丹青元化陳臯陶之暮謀盡仲山之夙夜
道因慮於文武業惟永於王霸綢繆恩渥荏苒代謝
國重元輔門承下嫁實大我之宗盟與人君之姻婭
天蓋福善地益華宗赫赫爲尹巖巖比崇不享黃髮
如何玄穹旣道長而運短豈祥降而惠終人亡令則

國失良相學隨司南文殞宗匠惟國華之見奪何天道之弗諒迨惟小子夙荷深期一顧增價二紀及茲非駑駘之足數蓋枝葉以見貽洎剖符於外臺承徹琴於舊館屢行號而身贖空匍匐而心斷跡既拘於彝憲情未展於哀款朝章猥及傳名斯入想德輝而不見望仁里而徒泣樹所歎而猶存人具瞻而永戢盡總帳之今感哀烏衣之往集庶羞雖薄奠享厥誠尊靈斯降是嘉平生已矣萬古纏綿五情追悲緒於離筵結巨恨於幽明伏惟尚饗

追贈祭文

開元二十年歲次乙亥孤子某謹遣弟等謹以醢脯庶羞之奠敢昭告于先考先妣之靈積罪昊天天實降罰嚴蔭永隔慈顏重違欲報劬勞終天何及夙承教誨幸而有成崇國寵靈猥當天任聖上義存延賞追贈所及朝恩優渥跪承摧感伏惟昭亮享茲殊錫今謹具贈太常卿廣州都督告身桂陽郡太夫人告身及玉帶金章紫衣各一副伏惟尚饗

唐丞相曲江張先生文集卷之十七



唐丞相曲江張先生文集卷之十八
墓誌銘

故張太師墓誌銘

故楊都督墓誌銘

故王府君墓誌銘

故畢都護墓誌銘

故趙許州墓誌銘

故韋司馬墓誌銘

故開府儀同三司行尚書左丞相燕國公贈
太師張公墓誌銘并序

大唐有天下百一十三年開元十有八載龍集庚午冬十二月戊申開府儀同三司行尚書左丞相燕國公薨于位享年六十四嗚呼哀哉皇帝悼焉素服舉哀廢朝三日乃下制贈太師蓋師傳之舊恩禮有加也詔葬先遠喪事有日又特賜御詞表章琬琰公義有忘身之勇忠爲社稷之衛文武可憲之政公侯作扞之勳皆已昭昭於天文雖與日月爭光可矣公諱說范陽方城人晉司空杜武公之裔孫周通道館學士諱弋府君之曾孫慶州都督諱恪府君之孫贈丹州刺史刑部尚書諱隲府君之季子自上世積

慶及公而祥發神明所府道德爲樞生以寧濟幼而休祥鷹揚虎視英偉磊落越在諸生之中已有絕雲霓之望矣初天后稱制舉郡國賢良公時大知名拔乎其萃者也起家太子校書迄于左丞相官政四十有一而人臣之位極矣尚書國之理本公悉更之中書朝之樞密公亟掌之休聲與偕升降數四守正而見逐者一遇坎而左遷者二其餘總戎于外爲國作藩所平除者惟幽并秉節鉞而已至若三登左右丞相三作中書令唐興已來朝佐莫比蓋聖賢之運有會師臣之道欲行人雖求多我每餘地馨香之發數

聞自久宜其翊戴聖后師範百寮功烈過於如神德
聲出於咸一此固與拔築崛起屠釣作合之類亦云
異也公志玄遠而性高亮未嘗自異會節乃有立何
所不可體道以爲宗既定國於一言亦保身之雅其
於經理世務雜以軍國決事如流應物如響紛綸輻
輳其猶指掌及夫先聖徵旨稽古未傳缺文必補墜
禮咸甄與經籍爲筮筮於朝廷爲粉澤固不可詳而
載也始公之從事實以懿文而風雅陵夷已數百年
矣時多吏議擯落文人庸引雕蟲沮我勝氣丘明有
耻子雲不爲乃未知宗匠所作王霸盡在及公大用

激昂後來天將以公爲木鐸矣斯文豈喪而今也則
亡嗚呼克生以輔時而臣道不究致用以利物而人
將安仰上撫床以念往下輟相而哀至復見之於公
焉太常議行謚曰文貞二十年秋八月甲申遷窆於
萬安山之陽燕國夫人元氏祔焉夫人故尚書右丞
相武陵公懷慎之女也動爲柔範皆可師訓及公之
貴連姻帝室雖處榮盛若非在己內執謙下外睦親
踈古之賢明未始兼有開元十九年三月壬戌薨于
東都康俗里第享年六十四長子均中書舍人次曰
均駙馬都尉衛尉卿季曰椒符寶郎泣血在疚皆我

文集卷八
之有後也嗚呼玄堂永闕何事春秋幽篆斯在亦云
不朽而已銘曰

天有密命滋液百寶時無大賢誰與明道我公允叶
我德孔昭翰飛戾天羽儀清朝功遂身謝名由實美
言而有立古無不死南山之下詔葬于茲後之與歸
誰我太師

故特進贈兗州都督駙馬都尉觀國公楊公

墓誌銘并序

公諱某字某弘農華陰人也某先食采於楊因邑爲
氏始大於兩漢更盛於周隋司空觀德王戎之高祖

也台階論道盟府書勲建維城澤流後嗣泊右衛
將軍贈兵部尚書府君諱某累葉炳靈六轡承祀而
皆千里一舉逸翰所推五侯同拜貴戚莫比公即尚
書之子也誕保中和克紹先烈幼以羨秀兼大淑之
文長而嘉聞增季友之業孝弟忠信蘊乎生知禮樂
詩書成於特習弱冠以門子調補晉州叅軍中宗之
在春官也妙簡才地將降天孫兼之實難而公惟允
以選尚長寧郡主加朝散大夫拜通事舍人累選右
衛郎將神龍元祀中興在運預聞大策克樹休勳而
貴主宜家既增湯沐列侯傳國復錫山川至是始襲

觀國公拜駙馬都尉左千牛衛將軍加上柱國累遷
秘書監兼太子賓客增金紫光祿大夫又特進散騎
常侍右千牛將軍陝王傳坐事左出巴州刺史又為
光祿卿復出為亳襄陳鄧四州刺史左轉鄜亳許絳
四州別駕公性明敏有器韻不求虛譽而百行允脩
不矜小善而九能咸事至於入官從政東文西武才
既兩可事亦百中且不恃貴以傷義不怙寵而廢公
奉以周旋加以撝謙雖在降出無他悔吝此亦公之
善自為謀以道終始者也開元十二年癸卯遭疾薨
絳郡之官舍春秋五十天子悼焉有制贈持節都督

督兖州諸軍事兖州刺史仍遣使弔問今返葬京師
率禮有加哀榮異數其年秋九月甲申葬于北原其
孤曰某等瑩瑩在疚願圖遺烈後之人亦知范宣之
世祿豈獨臧孫之立言銘曰

巖巖太華作鎮西土柞我諸楊降生厥祖四代而立
為漢元輔爰及胤裔克復先古倚嗟觀公不忝前人
荷天休寵為國嘉姻王孫作儷帝子來嬪瓊敷玉潤
輝映紛綸乃登王朝乃尊爵秩祿益萬鍾賦食千室
亦克畏滿亦以戒逸物更盛衰時有得失稟命不融
斯人則亡天歸京兆地返連崗吁嗟此室徽音不忘

故太僕卿上柱國華容縣男王府君墓誌

公諱某瑯琊臨沂人蓋王氏所由遠矣然其自漢至今上下千載海沂為頌始壯厥猷淮水作楨克昌其後繼跡台衮聯華牧伯君子躋其立言史官褒其行事則已世無遠德人以嘉聞圖謀粲然宜為冠族廼祖某梁侍中尚書左右僕射安乘亭侯高祖某陳度支尚書曾祖某太子中書舍人祖某皇朝吏部郎中贈潤州刺史父某官至洪州都督公踐修範業雅有名器性開敏而達於從事才果斷而長於御下至於學以知古義以隨時虛已存誠離經合道異焉而不

傷於物同焉而不害於政咸自得之務其大者儀鳳中初以門子選為孝敬皇帝挽郎解巾相王府參軍授豫王府參軍歷太子通事舍人蒲州司法參軍丁洪州府君憂去職喪踰於戚行過於禮時其在疚哀能感鄰服闋授相州鄴縣令施於政也揮干鎔之鋒截無不斷展騏驎之足行無不至以故言出有孚豈止於百里教行無類俄浹於四封邑人是宜輿頌乃作御史中丞張仁愿表公尤異帝用嘉焉遷洛州陸渾縣令加朝散大夫寵其能也再有仲由之善益聞考父之恭薄理我畿有加於業識者觀政許其以後

圖時輩推多驗之於晚節稍遷蒲州司馬洛州長史
蒲州長史三爲郡佐一心貫之執心有恒厥聲以茂
雖已祗之體素顧和之理識異代同官齊名比義固
無愧也俄遷隨州刺史趙簡始大列於諸侯張敞有
名擢爲刺史賢明獨斷政教弘宣始于漢東之美繼
以巴中之異郡歷數四課嘗第一再領遂綿二州刺
史先是俗多梗弊人盡流庸公亦來思撫之如子彼
得攸暨歸之如市行有餘力用不盡才驟遷大都督
乃拜相州刺史先是景雲歲我唐雖舊儀制維新置
連率之官增監郡之秩於是歷選列辟專謀用賢且

有後命而公爲稱首遂作越州都督同京官正三品
連率統察杭婺衢睦溫撫台閩八州長史已下率由
部按事雖竟寢議者終榮仍守越州都督加銀青光
祿大夫公素有盛名兼之寵數問望而草風必偃至
止而蓬麻自直與夫任賢坐嘯勞心行部彼有因致
此我無爲而已然政之行焉有若神者徵拜雍州司
馬頃之又正名爲京兆少尹京兆者本公之樂土居
已重世買臣還郡無矜於出授張旣本州是榮於衣
繡公雖作貳我亦爲光開元二年始封華容縣男昭
有德也其明年有制以公檢校太僕卿訓以六駟正

于群僕日加數馬之慎歲有展軫之勤無何即真可
謂貴矣然公思報所受逾勵所行神明未衰志業不
究春秋六十有一開元六年秋八月乙亥寢疾薨于
洛陽之陶化里第嗚呼哀哉朝廷傷焉賻贈以禮夫
人范陽盧氏不享偕老先時在殯其年冬十月乙酉
合葬于偃師之某原却倚首陽前瞻洛汭豈伊邈丘
之樂蓋取邢山之兆有子曰昊次曰旻泣血苦壞哀
纏於遠日勒銘金石儀叶于吉時假以斯文爲之實
錄其詞曰

其一

有周之裔居海之沂緒業爲永德音罔違貽厥謀翼
俾其翰飛宜哉世祀亦曰家肥

其二

洎我華容而今濟美四科冉季九能魯史學匪爲人
義如在已施於有政轡之柔矣

其三

稚馴宰邑鷹揚佐郡五爲刺史在邦必訓再踐太僕
厥庸迺奮今也則亡天不可問

其四

神期永年禮先遠日合如防墓開彼滕室鶴弔人悲

龜言地吉篆石泉戶與山相畢

故安南副都護畢公墓誌銘并序

公諱某字某東平人四世祖義雲比齊度支郎中青州刺史曾祖琰貞觀初并州白馬府右果毅都尉右衛郎將祖義蒲州河東令坐事左轉桂州歸義縣丞因家于始寧父誠舉孝廉高尚不仕公即孝廉府君之子稟靈純茂姿性開朗亦既志學休有令聞雖在諸生之中已有萬人之望矣夫其忠有世善有元仁於其親友于兄弟豈尚行所致其因心而然公之植身根萌素厚操有制末何適非宜故爲政之方所從

來遠矣某年初有御史將命黜陟幽明公時盤桓居貞未有攸往而使者承式固才是求褐衣見召直繩斯委乃表公授梧州錄事參軍非其好也先是剽劫在境行李所病網佐無幾連盜蕭然歲滿授廣州湏陽令事必簡舉人用穩便莫不咨嗟未始見也尋轉韶州司馬其政如初秩滿丁內憂公有志性幾於毀滅廬墓展哀泣血扶病有加一等不惟三年嶺南按察使廣州都督兼御史大夫蕭璿彼孝悌之士也以錫類之故有嘉德音於是拔補按察判官義行相成終始如一尤加欽重特以表聞勅授新州刺史屬恩

州酋帥日尋干戈將有式遏實資明允後按察使廣平郡宋璟以公爲五府總管以甲卒戍焉雖臨之兵威而開以恩信俾忿鷙狼戾化梟爲人廣平公深以爲能奏假恩州刺史俄又真授夷落大寧尋加朝散大夫遷端州刺史居必致理莫匪嘉績并護之寄朝選以歸於是加秩中散大夫拜安南副都護到官未幾聞忽遷殂時年六十某月日庚子歸葬于某山原公內行無玷外物不干文非務華學皆爲己所蒞數郡遺愛在人全已而歸可謂厚矣有子曰某銜血終天愴哀遠日水惟稱伐存乎幽篆銘曰

荷歟畢侯濬源長流受氏于畢爰自有周彼美世載寔惟孫謀賢哲繼軌斯其遠猷嗟彼懿宗是生孝友知實內積行非外誘家邦必聞人倫歸厚微此令德夫豈善守亦旣從政厥聞載榮邑能訟息郡用禮成蠻夷慕教鷓鴣變聲九真副嶺萬里揚旌護彼絕域義忘險艱緹律未改丹旌而還存沒之際忠孝之間徽音無泯篆德茲山

故許州長史趙公墓誌銘并序

公諱某天水隴西人其先受賜于周所食者趙下逮襄子大爲諸侯貽于謀孫克用保國有功有伐無代

無之曾祖某隋尚書左右僕射淮寧郡公祖某金紫
光祿大夫殿中監贈工部尚書武強公父某符寶郎
皆發聞馨香世祚蕃衍不高位者則人望焉公惇師
舊業允迪淵懿包君子大雅之量有古人獲心之賞
修詞以達其道則質文相半履行以顧其言則剛柔
並克弱冠以門子調補湖州叅軍轉相州司兵叅軍
學以入官思不出位格言清論始誦今行屬太上皇
養德在藩擇賢爲吏公首其舉王曰爾諧於是引爲
相王府戶曹叅軍轉法曹叅軍及龍德既享鸞鳴有
應往而利見縻以好爵乃授朝散大夫雍州錄事叅

軍綱領諸曹罔有不率秩滿除洛州伊闕縣令事舉
其中歛從其薄惠小鎮大狗公滅私政之在人今而
遺愛俄遷徐州司馬未幾轉陝州司馬許州長史千
里將騁六轡斯柔得之自心動而中節故其四叅州
事再入府寮一宰畿邑三爲郡佐莫不所居而績宣
其用所去而頌因其跡豈伊苟然厥繇尚矣開元八
年春二月疾作革乙丑終于官舍春秋若干某年冬
十有一月庚午歸葬夫人崔氏柩焉公自然淡泊不
屑勢利守道貞固與命推遷故歷年多所移官數四
不過參佐而已豈亦直道之云乎然而卑以自牧約

而能濟推厚居薄內安其仁急病攘夷外多其義不
曰君子其能爾乎有子曰令言次曰令則泣血加人
抑情就禮哀愴窳窳之事恭惟先君之德驗之所履
附之斯文以傳無窮以慰罔極銘曰

猗嗟令德寬仁合道景行行止風流肆好名取公器
善爲身寶志所以立政所以宣入官惟允蒞事其然
是儀是式不忘不愆今也終古後之克祚子孫煙祀
春秋霜露茫茫九原斯焉永慕

故韶州司馬韋府君墓誌銘分序

君諱某字某京兆杜陵人其先佐夏翼商賜命爲伯

傳楚相漢繼世能賢休有成烈慶流于裔洎曾祖津
仕隋至內史侍郎戶部尚書武德初拜黃門侍郎壽
光男克濟美名以食舊德大父琨太子詹事武陽侯
能承休軌載揚厥問列考展官止少府監主簿懿業
無忝而大位不充天爵自高人倫斯貴公荷百代之
丕構傳一經之素範簡白足以長人文敏足以敷政
跡不由徑必期乎直學不爲辯每抑其華志尚則然
風流自遠斯有萬里之望豈伊百夫之特始自崇文
生明經上第起家汾州叅軍公以爲國無小而行無
擇苟履忠信何陋蠻貊遂求補遠郡從所好焉於是

授泉州司倉叅軍歷廣州都督府法曹叅軍輪困下
蟠弗以屑意幹蠱用譽將以明道固已仁焉而不異
於遠義焉而不辭其難潛亦孔昭允謂君子秩滿遷
韶州司馬在郡數載檢身一德輔化致理刑清訟息
宜其奮庸上國寘乎公卿而天竟南州終于叅佐悲
夫享年五十有一某年月卒于官舍粵開元六年冬
十二月庚午葬于少陵原有子曰某欲報罔極思傳
不朽勒石泉戶式昭德音銘曰
皇矣鼻祖時維大彭黻衣作伯彤弓用征猗那其後
世濟其名雖公道屈亦樹德聲

右其一

休烈有素聿修無忝言炳身文禮充物檢行雖欲盡
名不可掩學古入官蓋取諸漸

右其二

叅卿彼分從事窮海孰云其陋我惟義在何適非宜
胡然有待天曷我欺人隨物改

右其三

唐丞相曲江張先生文集卷之十八

唐丞相曲江張先生文集卷之十九

頌碑銘

故靳公遺愛銘

正平忠憲公裴公碑銘

徐文公神道碑銘

故襄州刺史靳公遺愛銘并序

江漢間州以十數而襄陽爲大舊多三輔之豪今則一都之會故在晉稱南雍在楚爲北津厥繇冗雜亦云難理而前此領郡鮮能安人或寬或猛或拘或抗跡多弗類俗亦弗寧是以天子念與我之理而公受

煩卿之寄矣公名恒字子濟其先某人也祖帥幽州
長史父禮庭奉天討監察御史世不苟合義在難進
雖無充量之位而有積善之烈矣公性持重有器望
即溫而厲居敬而簡度量可以轉物德義可以服人
而先王遺言率由好學君子行道必本忠恕浚源水
潔厲翼雲翔故一舉為拾遺已有遠致三人為御史
侃然正色當時知音謂且大用而尚書理本郎官選
才亟踐諸曹克壓群議及再典大郡遂佐益州攝御
史丞都督西南軍事原軫趨將豈惟上德翁歸中立
實兼文武先是兵連蠻徼歲轉軍儲優我公私費以

巨億公乃急其所病思有以易之建大田於雲南罷
饋糧於巴蜀向之踰重阻冒毒瘴負擔以路斃垂耳
於剽掠者每十有五六及公底績盡境賴全至於是
邦也政實有素今也惟行不違其方以索其極莫不
教之誨之優之柔之從者善之否則威之先德後刑
端本肇末物知所勸事則有經率訓者衆多變薄為
厚感惠者深遠既和且均夫然後人斯恥格庭少諍
訟叅佐閑拱屬城晏如其始也一年而政成其終也
三年而頌興愛之如父母畏之如神明開元十二年
以理跡尤異廉使上達天子嘉之稍遷陝州刺史陞

解印去郡攀車盈途或願借留無緣而人吏遮道或
瞻望弗及而老幼啼呼如是者五里而終朝十日乃
出界而皆有言曰捨我何之及聞公之喪哀可知矣
市爲之罷春以之輟惠愛之結深古今之感一蓋爲
仁由已而遺德在人者其若是乎郡中士大夫與門
生故吏聚族而議譔德是必刻石立紀彼鮑陽之陋
墮淚成碑此峴山之績銘曰

英英靳公宣哲秉彜爲我髦士作人元龜倜儻大節
磊落瑰詞人亦有言天實資之御史直繩郎官高選
動必兼遂能皆再踐糾遏邦慝彌綸事典遂及我人

化流樊沔激厲素風抑揚善政約紀爲法急人所病
物故推誠事匪忘教感被于下仁明在詠舉德不鮮
涉道載深穆然清風莫其遺音繁公既沒厥跡可尋
勒石是圖以慰毗心

大唐金紫光祿大夫行侍中兼吏部尚書弘
文館學士贈太師正平忠憲公裴公碑銘并

序

夫道遵常習故蓋人拘於凡也得精忘麤是天縱於
聖也方聖上之拔太師也豈藉譽於朝廷哉徑取才
於無跡懸收功於未朕而終致大用克成休勲使祖

虛名者見西子而憎貌工橫議者聞魯連而杜口乃
知古所則哲雖帝其難今之得人遇聖為易能允明
主之鑒不負真賢之實者其在正平忠憲公乎

公諱光庭字遠城河東聞喜人也伯翳之後與秦同
姓始封于裴因邑命氏在魏晉之際為人物之傑與
瑯琊王氏相敵時人謂之八裴八王自茲厥後奕代
更盛大王父定周大將軍馮翊太守瑯琊公大父仁
隋光祿大夫追贈持節原州都督天之既厭隋德矣
見危致命不亦難乎謚之曰忠憲春秋之義也父行
儉禮部尚書兼定襄道行軍大總管聞喜縣公贈大

尉時或有奸王命矣禁暴安人不謂重乎謚之曰獻
尊名之典也公即獻公之第七子降神元和合光不
矜越在初歲已有老成雖遠大是圖而近識莫誤學
探帝載何事小名業綜人倫豈矜一善弱歲居太尉
獻公喪幼以孝聞尋補引文館學生神龍初明經擢
第授家令寺丞轉太常丞加朝散大夫景龍中以親
累外轉尋入為陝王友改右衛郎將丁晉國大夫人
憂柴毀骨立殆至滅性服免起為貝州別駕未之就
也復除右衛郎將無何遷率府中郎嗟乎有其道而
無其用不可行也得其時而不得其志亦不可行也

公負經綸之器韜王霸之累自委泊外臺棲遲下位
出入從事十數年間坦然而自若者何哉蓋知才有
所必伸命有所必與非苟而已開元中聖上思光祿
之休烈蓋太尉之元勳是必象賢其將大授特拜司
門郎中轉兵部仙臺之文始應列宿鴻漸之羽可用
爲儀遷鴻臚少卿以觀其能也是歲天子有事于岱
宗諸侯會朝于行在執籩豆者不限於中外獻賧書
者亦勤於駿奔莫不來享無有遠近而執政者以公
代曉邊事職在行人且曰夷狄豺狼贖盟阻德我今
有事戎或生心我張吾師有備無患若何公曰不可

夫封禪者所以告成功也觀兵者所以威逆命也云
亭苗扈非一時之事也受脰執燔非三代之禮也天
方佑我光啓舊服憬彼獯鬻能違天平無庸勦人可
以謀告從之秋九月突厥果使其相執失頡利發與
其介阿史德噉泥熟來朝公之謀也東封還遷兵部
侍郎圻父之職夏卿之亞存而舉者悉以舉之公於
是考遺訓補缺典飾蒐苗獮狩之禮詳征稅簡稽之
賦頒九畿之政設九伐之刑以練國容以精軍實邊
鄙不聳帝用嘉之既而拜中書侍郎同中書門下平
章事兼御史大夫王言其出濡乎人有歸也天憲惟

明肅乎人知禁也尋加銀青光祿大夫換黃門侍郎
俄遷侍中兼吏部尚書弘文館學士總百揆之樞轄
酌九流之淵與叶文執之殷度人神之和水火象鼎
其惟實鍊山川出雲用作霖雨時哉之會無得稱焉
先是大化之行務以玄默遵夫簡易舊章在而不議
吏道雜以多端公於是求革故之實契隨時之義作
執秩以平之設循資以定之謹權衡以選之考殿最
以叅之姦回無所措其邪蹲踏不能介其量多士動
色郡方改瞻仰之者邈乎如山窺之者間不容髮或
曰執事無乃惠歟公曰大命敢不敬歟若然方將致

六符於泰階驅百姓於仁壽豈直睥睨先世紛綸近
古汨而隨流守而勿失云耳哉二十年冬上幸河東
祠后土命公兼左軍師禮畢賜爵正平男加光祿大
夫抑人有言曰樹德莫如滋積仁莫如重則臧倍之
慶有後於魯樂武之德未絕於人宜公侯之子孫必
復其始也公嘗讀易至益之屯與升之漸迺喟然嘆
曰物惡有滿而不溢高而不危者哉旣而居不崇侈
動不踰法雖百乘之家萬夫之長冲如也謂日用不
知存諸方冊何天年未求瘼此台臣二十有一年春
三月癸卯遘疾薨于京師平康里之私第春秋五十

八朝廷哀傷冕旒震悼制戶部尚書杜暹即殯弔祭
賻物五百段粟五百石喪事優厚官供輟朝三日丁
未有詔贈太師謚曰忠憲使某官某監護喪事以某
月日葬我忠憲公於聞喜之舊塋禮也初知星者言
上相有變良臣將歿謂請禳之公曰使禍可禳而去
則福可祝而來也論者多之以爲知命夫天下之達
道有五所以行之者三曰忠孝仁安君忠也榮親孝
也周物仁也此三者有一於身鮮矣而公實兼之且
媚于人者必好其威福賢於事者必羞其謗政公知
其然則以直道匪躬之故忠莫厚矣禮爲人子春秋以

致享義於人臣夙夜以從命公知其然則以時告如
在之敬孝莫重焉夫以衡石之任陶鈞之力莫不責
成於下吏未備於一人以故舞文雷同疑獄歲構恬
而不改浸以成風公知其然則以信察御物之惠仁
莫加焉其行已奉公皆此類也嘗所著述率于箴規
以爲惇叙九族本枝百代王者之盛也而義不可以
無訓作瑤山徃記維城前軌以諷之微而彰志而晦
聖人之舉也道不可以虛行作續春秋自戰國迄于
周隋以統之臣子之義也天人之際備矣非洽聞通
理其孰能與於此乎宜其存無辜人歿有遺愛嗣子

積京兆府司錄事參軍孝實克家動必中禮丕承後
命紆天鑒而增華敢跡前修琢豐碑而不朽銘曰
益作舜虞鉞分晉土慶流八族德盛三祖瑯琊象賢
懷文佩武光祿忠烈殺身報主尚書出將恢我王略
文教內敷武功外鑠緇衣之弊惟公繼作用晦而明
處豐恩約鴻臚好謀夏卿稱職代天流化佐皇立極
納于憲府好是正直乃宅冢司謀猷允塞盡瘁事國
夙夜在公居無闕政歿有餘忠天子命我頌德銘功
日月有既今聞無窮

大唐故光祿大夫右散騎常侍集賢院學士

贈太子少保東海徐文公神道碑并序

夫物之所宗也莫善乎德行道之以明也莫先乎文
學人倫以具體為難世業以濟美為貴有能兼之者
其東海公平公諱堅字某其先東海郟人永嘉之後
仕業南國因家吳興焉隋氏平陳徙族入雍今為馮
翊人也原其伯翳平水土實佐文命偃行仁義大啓
徐方因國保姓克昌厥後逮乎漢魏間出仁賢十二
代祖晉江州刺史順陽簡寧侯至五代祖梁直閣將
軍慈源侯整整生陳始安太守綜綜生隋延州臨貞
令方貴方貴生唐果州刺史孝德生唐西臺舍人贈

禮部尚書齊映出入六朝載祀數百文武冠冕存歿
光靈訓子克家謀孫必復賢風儒行世有其人公即
尚書府君之元子也生而濬發默識經藝夙自童齡
則美文言時先府君爲沛王侍讀公之岐嶷聲振平
臺王聞而延佇與之談議授簡能賦博奕惟賢門
客府寮深所厭服奄遭不造十四而孤祖母金城郡
君姜太夫人念其聰異誨以志學公遂尅勉詣心精
微磅礴九流激昂三變景倩幻露實賴駭孫令伯大
成抑由祖母上元中遭姜太夫人喪哀幾滅性制則
從禮有感斯絕無聲常淚服闋州辟秀才其年登科

解巾補汾州叅軍部送邊備至于定襄軍使王本立
素重公才署爲管記書奏謀筭悉以咨之坐耀鋒鉞
未嘗肯繁尋而換雲陽尉萬年坐簿親累出爲楊府
工曹振鱗將搏載躍京轂垂翼遠逝有聲東南俄遷
太子文學時秘閣群籍大抵訛謬有勅召學士詳定
公實在焉爲之刊緝卷盈二萬時輩絕倒伏其博達
尋與李嶠等撰三教珠英書成奏御拜司封員外尋
加朝散大夫即拜郎中稍遷給事中以公代及文史
詞不失舊雖居瑣闥尚比纒牽遂除中書舍人君子
曰舜之官人也二年勅公修則天聖后實錄及文集

等絕筆中宗嘉之璽書敦慰賜爵慈源縣子賚物五百段旌良史也遷刑部侍郎加秩銀青光祿大夫轉禮部侍郎兼判戶部公久踐朝廷累登省閣舊章必練即事無疑雅不煩文深得大體雲臺高議以此歸之進封縣伯食邑五百戶無昭文館學士受詔與天竺僧菩提流至譯寶積經及柳冲等同修姓氏系錄二教寶真萬族有倫亟見成矣太平公主內秉國權駙馬武攸暨外收人望命公至第拒而不行惡夫佞也景雲初令上夷亂主營東朝官相四員特難其選二以宰臣兼領一則天子故人任良兩官實在公矣

遂除右庶子兼崇文館學士修史如故進爵東海郡公食邑二千戶遷右散騎常侍以本官兼黃門侍郎尋而即直祿賜同三品爵崇五等道茂兩官利君謀身舉代皆譽又以刪定格令承恩進爵二等公請又授叔父齊莊帝用懷之遂封莊為長城縣子天下義士莫不激昂焉侍中岑羲公之姻婭與其聯事深自危懼求典閑司以遠祗悔遂改太子詹事追羲禍敗地絕嫌疑先是不交定王及此不昵岑氏見炎莫附思患預防信達人也復以親累出為絳州歷永蘄棣衢四郡山川分位楚夏異齊公政不易宜教以因俗

德化歸厚人共由之開元中會同京師遷秘書監無
何轉國子祭酒皇帝稽古崇訓開堂集儒以公才學
元長命登首席遂令集賢殿修撰又除右常侍以公
為學士副丞相燕公知院事綢繆顧問日月獻納恩
渥尤及少有其比上將柴于岱宗詔公草其儀注定
禋祀之位廣配類之儀博文約禮或公或革言出而
伏事立而天從時議遠矣及禮畢奉恩特加光祿大
夫時置十銓公在分掌程不愆素且無遺才公既贊
相謨猷從容調議大鍾必諫溫樹不言啓沃盡規實
致君於堯舜死生有命空比德於老彭享年若干以

開元十七年龍集己巳五月丁酉薨于長安頒政里
之私第聖人震悼君子稱嗟翌日有詔褒贈太子少
保贈物若干段粟若干石特遣中使內侍尹鳳祥弔
祭而別賜布帛若干端疋俾鴻臚少卿元復監護葬
事官給鼓吹儀仗太常考行曰文君子曰仁而愛人
敏而好學家有榮業紹其弓冶國有大事修其典章
謚之曰文不亦宜乎其年冬甲子與夫人故南陽郡
夫人合葬于萬年縣之少陵原先塋禮也公寬裕有
禮溫良能斷智出于象外樞得其環中之積也厚
名之立也大故起自黃綬累踐赤墀五省推高連州

得最事將時並位與才偕莫之天闕也至於升堂入室探微覩奧動有禮樂之運言有雅頌之聲是惟無作作則萬物和而八音備矣蓋嘗注史記修晉書續文選大隱傳及有文集三十卷皆資於故實博於遺訓古今通變河漢共高或藏名山或升天府豐豐然各得其所嗚呼文仲歿而其言立子產終而遺愛存公則備焉宜受戩穀保艾厥後代代守之有子曰峻嶠崐等才以雅著孝以特聞學茂高曾之科旨詞雄祖考之風格備歷清貫皆立能名三賢德聲方賈氏無愧累葉儒訓與班門孰多咸瞿瞿如皇皇如昊天

不追終身積痛求舊撰實勒諸墳道僕從述者之後敬而伸之乃爲銘曰

舜命益虞疇功帝俞偃行文教代集通儒光華鼎閣出入秦吳門多長者君其最乎

右其一

曾是好學果行洵美日就麟成鳳積鵬起黃綬覆篋朱門方軌官籍正人朝稱良史

右其二

三入承明五遷外郡道有出處心齊喜愠帝思啓沃國常師訓屢獻箴規偏承顧問

右其三

居常有異博而無惑綿蕤孫通銓衡叔則為龜為鏡
立言立德胡不才遺左右王國

右其四

悼興冕旒哀結衣簪官供羽俠士惜人琴已矣終古
平生德音松枝掛劍碑字生金

右其五

唐丞相曲江張先生文集卷之十九

唐丞相曲江張先生文集卷之二十

碑碣銘

牛刺史碑銘

竇少府墓誌銘

呂慶王碑銘

果州長史李公碑銘

李參軍碑銘

後漢徐穉碣銘

趙令碣銘

大唐贈使持節涇州諸軍事涇州刺史牛公

碑銘序

夫志道莫先於無欲福善莫大於有後始而晦跡終不近名非道德之合歟生我勞臣立于遠績非善慶所致歟所謂伊人其在牛公者矣公諱某字某先子姓竇始殷後有牛父者則宋之大夫胤裔蕃行人物更盛邨爲護羌校尉崇爲隴西主簿遂家隴上是稱冠族其後因官安定爰處鶉鵠今爲郡人亦旣重代矣公之族祖有竒章公者隋宗室臣風流篤厚典章損益百代可知天下稱之地靈斯在大父通秉志高尚守道不携當時交辟辭疾不起父會弱齡早代有

才無祿公夙構閔凶終鮮兄弟性且純至孝思罔極幼以子立志不違邦輿道爲徒求仁自我不屑軒冕考槃丘園雖云屢空晏如也六郡自古五方雜錯負力怙利上氣好武人庶相放風俗不純及公冲和其返真樸外以義行格物內以默致頤神不飾智以驚愚不弃同而即異有恒其德無斁於人鄰落爲之變風狼戾以之率化公旣浮雲不義介石惟一或勸之仕但笑而不言飛鴻冥冥胡可量也開元六年隨子西征以就色養春秋高矣道茂年衰魂氣其歸賢達共盡越五月寢疾終於伏羗之官舍時年七十有六

冬十一月歸葬于北原夫人同郡王氏不享偕老先
是即代母儀婦德宋子齊姜自歸于我宜爾家室不
有配德曷生此子有子仙客爲國之良用商君耕戰
足國修充國彘胡之具出言可復所計而然邊扞長
城主恩前席且以子貴之義有加父存之禮玄澤下
建素風激揚陰德所流大福斯至十八年有詔贈涇
州長史二十二年冬且有後命贈使持節涇州諸軍
事涇州刺史夫人追封太原郡夫人於戲存而累仁
沒有餘烈福自昭於玄體道非異於異時及其影響
同符寵光如答雖松楸已拱而章紱載華死有可作

無異會稽之節生苟爲耻安用鴈門之肉貴與不貴
可不然乎嗣子銀青光祿大夫大僕卿判梁州持節
河西節度使兼隴右郡牧都使支度營田使隴右採
訪處置使攝御史大夫隴西縣開國子仙客叩心知
遠昊天莫逮以爲先美蓋闕後嗣有媿且澤漏幽壤
得不銘恩名典本州豈徒錫羨而已銘曰

隴上多壕山西好武使君貞獨幼不斯取惟道爲徒
與代立矩善有餘慶風亦變古不學而知不行而至
跡有相混名無自異出入百年終始一意福流于後
神明其事行止於身用存玄體厥子嘉績中朝緝禮

印迴壠遂門重旌繁逸人之墓今同郡邸

故河南少尹竇府君墓碑銘并序

序曰正其身君子所以慎德敏於行吉人所以寡辭
或道之或處之是亦正命命之將行利有攸往則行
不家至而人勸言不面命而事濟不為跡而實以阜
蕃不沾名而聲以適駿夫如是者存乎其人故河南
少尹竇公蓋有之矣公諱某扶風平陵人自後魏大
將軍侍中永富公至烈考瀛州刺史贈刑部尚書莘
國公六葉矣皆增華鄉族見重公朝四國于蕃四方
于宣龍旂成祀六轡耳耳公所謂盛德必祀承簡子

之始大積善餘慶是僖伯之有後故生則靈知長而
純固既白而受采亦黃以通中天儆不器之性人服
自然之理而況於文雅緣飾志業孔修引伸足以長
人動用足以利物既學從政其歸簡易形有方殊道
以一貫人致一意而已我乃萬目盡張故其始也以
明經上第授彭州叅軍事詢謀郡將器異甚厚所遇
森然其言固矣如山之為始於覆篲如江之導終以
方舟於是累遷至于薛王友贊善大夫燕王築館以
待士漢儲立苑以招賓當其推擇莫匪賢俊議者惟
允而公在焉然由韞匱隋和十城空其價蹠躡驥駟

千里未之騁及其用也再入尚書郎遂爲洛陽令三
臺雅望一時精選舊章資以彌綸利器呈於盤錯出
宰百里實推三河其賦政則必及於其身亦既誠信
被之於物是爲惠懷故雖二州餘弊儉巧而難理五
郡尤劇權顧而多姦莫不可使由之令自求之善處
中於下講能合遊刃至於釐舉風俗之謬裁正人倫
之經務勸衣食之原調均經賦之事本爲已任無間
人言故視事踰四年通而不倦道德在百姓久而益
彰非夫明允宣和優柔博約自我之不忒爲人之攸
壅亦曷由臻茲厥有洛陽所謂賢令者則周紆王渙

孔明祝良公實續之誰其似之屬天子建中都營新
邑咨爾亞尹俾其董司朝選其人公首斯舉以故稍
選河中少尹且有後命廢府而復遷河南焉以公之
歸從人之望官則改次政無易方以佐理王都以表
則天下而年不克祚位不光寵遇暴疾而卒悲夫是
歲有唐開元之九載春秋五十有六公以孝友爲體
一變而迪忠信以明恕爲用再變而致循良故所行
無擇所事無巧有恒其德終且溫溫不伐其功昭然
赫赫所以遺愛固結必在何武之去稱誦斯深惟恐
子產之死已而神道欺而不福物情喪其所賴人之

不幸今也云亡及喪之西歸則人吏致哀道路相屬
得人心如此冬十一月葬于北原後之人或者將遊
於斯歎於斯彼其與歸我乃不朽矣其子八人長曰
某次曰某家有六岳之德里以高陽之名夙構閔凶
能哀傷以殆滅匪革其道懼功伐之不傳俾予爲文
以叙孝子之志銘曰

綿綿瓜瓞少康遺烈靈則長兮莫莫葛藟王孫承祀
世其昌兮而我實績如金如玉載揚光兮次亞尹之
德柔嘉惟則揚令聞兮惟別駕之功邦國不空毗胥
詠兮不競不絀不剛不柔以成政兮德之攸好神之

所勞實降祥兮有美無度曷不肯昨今則亡兮我著
名節俾無泯滅惠無疆兮

唐贈慶王友東平呂府君碑銘并序

夫官雖序賢志道者不常有位才雖屈命福善者未
必無後子夏文學之達以爲富貴在天于公决曹之
平則云子孫由我蓋不享當代生數猶竒流慶後人
玄體乃用亨之會也蓋有原焉

公諱處貞字處求東平人曾祖北齊幽州長史府君
諱贊祖隋貴州中正府君諱伽考渝州清池令府君
諱師昔伯夷佐唐實典三禮四嶽佐禹用平九州虞

夏以功而見封申呂因邑而命氏惟時厥後弈代不承公正性之有自來直道之不充詘嘉勇退之義德避近名之未然越在弱齡棲遲事外用光本於藏曜履行期於滅迹不遠於仁行之斯至不苟於義方之自止佐一郡而即安居九夷而匪陋始不然者公下椽於東裔載起家授玄州司戶叅軍晏如也言旋初服遂從所好外物之槩不雜於風塵遠子之言惟聞於詩禮所謂溫良淑慎無競伊人者歟天冊二年夏四月遇疾終于家春秋五十有二開元十四年冬十一月塋於邑城西南四里原夫人北地傅氏附焉夫

果於立誠靜以俟命力不足者則不疚運不至者則不憂物情之難及我而易是以名利衆之所欲也公則澹泊之德義人之所鮮也亦克蹈籍之如此而神不勞福不流未之有也有四子長曰玄知今左威衛司戈次曰玄悟中散大夫使持節鄜州刺史次曰玄智左威衛執戟次曰玄爽左衛長上惟玄悟至大官此其教忠有舊服義無斃好爵是與餘慶所貽入爲王門之長出居邦伯之列屬恩推子貴名彰身後事有光於冥漠令德乃發於馨香三命爲大夫百代稱先子孝理所賜邦族爲榮開元十七年有制贈公慶王

友夫人贈河間郡君異人之符至是所驗惟神之鑒
謂之不欺公之女孫曰東平郡夫人冠軍大將軍右
監門衛大將軍渤海高公之夫人鄆州刺史之女也
冰玉相輝椒蘭同馥由福履於君子與嘉會於羹
齊姜于歸魚軒暉以照路廊時之往熊戟殷其若雷
有車服而始大履霜露而追遠於馭食于菹德無忝
爾之奉先樹之休聲有以見其歸美銘曰

赫赫我祖惟師尚父泱泱大風悠悠終古施于胤裔
憲是文武我美其濟我則斯取雖匪高位亦惟碩德
我王之友彼夫之特既貞且亮宜語而默投足皆安

終身不惑我積善以福後人彤嚮家慶煒煌宗姻
瞻彼松檟錫之絲綸今也追飾實爲先臣先臣伊何
宜其有後志之所尚義無所苟身雖旣沒名豈虛受
立德在茲亦云不朽

故果州長史李公碑銘并序

公諱某字某趙郡房子人其先自段干木至栢仁侯
皆以醇德茂功奮乎上世始於藩魏終而將趙其名
不殞遂濟子令五代祖後魏中書侍郎始封懿公璨
珠生徐州刺史始封慎公元茂元茂生趙郡太守君
諱鳳昇鳳昇生駙馬都尉直閣將軍府君諱道宗道

宗生齊尚書右外兵部郎中府君諱山壽公即郎中
府君之子仍世致美在邦攸宜故我公稟靈中和履
道元吉以學則探其奧旨見聖人之心以行則踐其
嘉言合君子之度以故動爲人譽名乃日宣義府孔
修德輿云遠固未可量也隋大業中舉孝廉泊唐興
調棣州司戶叅軍凡遷磁相二州總管府戶曹叅軍
宜州錄事叅軍莫不事人以直反身於誠處卑能安
敬長則順故光輔郡將周爰我咨自州祖州或嘯或
諾旣而遷金鄉晉陵二縣令精誠以莅事善教以長
人四封用孚三英以絜破蒲與密獨何有焉以課晁

遷歸州治中郢州司馬加朝散大夫行果州長史盤
桓叅佐未復公侯道非吾行德無必貴遂以沒化豈
命也夫某年月卒于官舍享年若干及喪至自蜀而
塋不歸趙乃卜宅於許封樹汝墳子孫遂家亦旣重
世至開元中公之孫曰察以古諸侯之祿奉先大夫
之祀晝遊本郡輝光前烈非清白以遺善慶之餘保
艾爾後人亦何以臻此於是龜霜爲感恭惟春秋之
事刻石是圖俾揚祖宗之業斯善繼者也叙而志
之銘曰

長史英英作爲世程動合雅度休有令名以之入官

從事而允以之佐郡爲政孔明悠悠上天曷不貴德
終于叅佐孰云邦國孝孫其昌餘慶乃彰家樹蒼蒼
德音不忘

故瀛州司馬叅軍李府君碑銘并序

君諱某字某趙郡房子人祖山壽齊尚書右外兵部
郎中父仁瞻朝散大夫果州長史世德數載見于先
碑公懿烈無忝雅其度量體和而韻緒之以絲性惋
而文受之以采故好學不倦而墳典必精慮善以動
而規矩皆中悉心存乎道義餘力見於文章人以美
談日聞休譽翊冠舉進士調補同州叅軍換瀛州司

戶叅軍以素所履以施有政居獲乎上往得其中無
不嚴祇長史之所嘉歎無不崇讓同年之所厭服宜
爾戩穀光昭令圖如顏子之不幸豈卜商之云命某
年卒于官舍春秋若干公家世尚儉子孫是式初先
大夫之喪也清白以遺而果無私積高標是營而庶
有餘慶豈所謂不戀本達也無懷土以重遷不傷生
仁也無困財以乏祀夫然趙之北際何必故鄉許之
東偏亦云樂國故喪之歸也遂窆于斯及嗣子察受
教義方能纂德業服事華髮潔身清朝天子方差擇
其良惠恤于下由是解印少府部符本州衣繡而歸

雖榮之在晝重因以立而悲不逮親結諸心形諸色
孝子之志國人所稱於是乎歸美以揚先讓德以示
後蓋承夷之義也得無述焉銘曰

倬李侯世載德行時範言士則三英發百夫特肥而
家華而國美無度命不融足方騁途斯窮子餘慶享
次嵩我不訓藹遺風

後漢徵君徐君碣銘并序

後漢高氏徐君諱穉字孺子南昌人也先生受天元
休含道傑出生知而上貫之以一體資清純動適玄
妙知道之將廢乃窮則獨善躬耕取資非力不食鄰

落所處率化無訟在漢之季遭時溷濁不抗迹以庇
物故退棲山林不苟利以辱身故進無祿位五辟宰
府四察孝廉文舉有道就拜太原太守皆辭疾不起
延嘉二年尚書令陳蕃僕射南郡胡廣相與上疏極
言先生宜爲輔弼協和人神漢桓帝猶能安車玄纁
備禮徵聘而竟不屈志知時之不可久也然而諸公
嘉招雖不之屑及聞薨卒徒步弔祭禮有所尚隻雞
不薄意有所將生芻爲貴士之感義實衰世之有補
仁而見德俾後生之可尋其廢中權行中慮皆此之
類也昔者夷齊介潔而遠去沮溺野逸而離群顏闔

雜杯以遁逃接輿狂歌而詭激此誠作者或類沽名
夫有所不爲志則偏也無適不可用之極也先生則
貶絕在心而經脩於世純儉以存戒博愛以體仁應
物以會通全已以歸正漢庭所以宗其德天下所以
服其行豈與彼數千直逕庭而已哉靈帝初欲蒲輪
聘會先生以疾終時年七十二有子曰季登篤行孝
悌亦高尚不住皇唐開元十五年予忝牧茲郡風流
是仰在懸榻之後想見其人有表墓之儀豈孤此地
則先生之德其可没乎銘曰

靈芝無根醴泉無源角立傑出先生斯存英英先生

德不可名斯出無應鴻飛入冥道高事遠跡陳名邵
勒石舊邦以觀其妙

故辰州瀘溪令趙公碣銘并序


有唐瀘溪令晉國趙君諱某字某終於其位嗚呼魯
史既沒稱行者不在茲乎荀孟已來論命者亦何謂
也放其言而無苟作合乃遷行其志而不迴與權必
遂故道每屈於位身必後于時而猶守真不奪固窮
自若立誠者既獨其所善尚德者徒隨而為名名非
欲彰以美實而自著位非欲下以屬守而遂卑此由
命而然歟為自我而然歟無代無之而今實續之矣

公大祖盱北齊河間通守因家于饒陽亦既重世今
為饒陽人也曾祖北齊幽州大總管大父隋鉅鹿大
中正府君列考范陽令府君皆累行積慶以貽于後
正性直道遂終於公公剛潔不群精明獨斷非義所
在不以利汚名非禮所安不以跡傷教有立卓爾童
卅而然既學大成紛綸博綜將求祿養也而俯就鄉
舉尋而明經登科補太子正字又改射洪尉皆以逮
親自乞執政自表遂屈換定襄尉公欣然而捧檄矣
秩滿轉洪洞主簿永城丞時縣宰敗類公止之不可
雖盡同官之心且急下人之病義形於色彼用我讐

此貪而無親難與心竟公剛亦不吐乃邁力爭迄用
上聞因而坐免邑中黔庶莫不咨嗟求而得仁退則
無愠矣乃返初服遨遊墳素精義致用清風被物或
太守咨訪偃息自蕃或諸儒稽疑廢疾皆起是時中
書侍郎河東薛元超人倫之表也將命河朔實舉廢
滯企我休風延以殊禮立談體要大見嗟稱以故表
聞其庶乎簡帝心會有陰忌之譖實為無妄之禍矣
進既曾母致疑退而賈生投弔不無故也以此左遷
廬溪丞公竟不自列窮則體命雖在幽闇鬼神不欺
苟推忠誠蠻貊何陋時縣無長史政則我由未歲月

而已成無谿谷而不悅五鄉自專之子左言難曉之
民翕然同辭乞為父母於是詣闕投疏至于再三朝
廷尤之則受虜溪令公事副誠請增修德化乃鄒魯
設教而夷楚變風迨公遷殂闔境號慕古人遺愛何
以加也遺令戒子留葬洛陽斯又不戀本達也有子
曰瑄歷官侍御史尚書郎洪州都督霜露既變則感
念以時陵谷有遷而音徽何代君子所懼于斯誤德
銘曰趙侯之德好是正直令儀令則不回不忒寔邦
之選彼夫之特玉堅而折膏明自煎宸陽于遠淑浦
迴遭下邑已矣君子殲旃遺令桐鄉歸魂崇芒瞻彼

有洛維水泱泱德音不已於斯揚揚



唐丞相曲江張先生文集卷之二十終

唐丞相曲江張先生文集

附錄

誥命

轉司勳員外郎敕

通直郎判尚書禮部員外郎張九齡温粹冲簡

虛懷朝議郎河南府法曹叅軍袁暉清雅正器

執物並富仁踐義崇德著言詞學高步於當時領袖

允彰於後進或早遊禮闈或久處神京甄其奏議可

序勳禮之籍九齡可守尚書司勳員外郎暉可行尚

書禮部員外郎散官各如故

開元八年四月七日

加朝散大夫誥

朝議郎行司勳員外郎護軍張九齡

右可朝散大夫

門下朝議郎中驍騎尉王昱等文臺效美書省推能
句籍冊墀聲華紫帳或榮升儲館或政洽端僚畿甸
揚芬京都課最咸逢朝慶式光通級可依前件主者
施行

開元九年十月十四日

轉中書舍人敕

門下朝散大夫行尚書省司勳員外郎上柱國張九
齡含章間出稟秀挺生學摠丘墳詞變風雅早應旌
辟累踐青華行居四科之首才稱一臺出妙司言缺
位側席求賢宜以起草出能式長如綸之命可中書
舍人內供奉

開元十年二月十七日

加朝請大夫敕

朝散大夫中書舍人內供奉上柱國張九齡

右可朝請大夫如故

門下守朝散大夫中書舍人崔沔等並愷悌忠信七

林推重禮樂詞華掖垣高選郊禋上帝侍從圓丘宜
增榮級俾承大慶可依前件主者施行

開元十一年五月二十八日

封曲江縣開國男食邑三百戶敕

朝請大夫中書舍人內供奉上柱國張九齡

右可封曲江縣開國男食邑三百戶

門下朝議大夫中書舍人上柱國上谷縣開國男竇
泚等俱膺五等之榮俾光兩闈之寵可依前件主者
施行

開元十二年正月十三日

加守中書舍人敕

門下朝請大夫中書舍人內供奉上柱國曲江縣開
國男張九齡文含風雅道映簪裾朝請大夫試給事
中上柱國褚琇學摠古今詞兼典則或司言右掖綸
綽戴華或參議東垣駁正斯允便繫日久忠憤逾深
宜章稱職之名俾加即真之命九齡可守中書舍人
琇可守給事中散官勳封各如故

開元十二年十二月十三日

加中散大夫敕

朝請大夫中書舍人上柱國曲江縣開國男張九

齡

右可中散大夫勳封如故

門下太中大夫御史中丞內供奉上柱國蔣欽緒等咸以雅望並登朝列緝乎功績光我朝猷而有事宗侍升柴燎告成之典既展於封崇行慶之恩宜加於班序可依前件主者施行

開元十三年四月二十五日

轉太常少卿制

門下中書舍人上柱國曲江縣開國男張九齡夙擅能文早推強學清簡彰於莅職謹確著於立身掌誥

禁垣是稱無對亞司宗禮時稱有歸宜參象河之任以光得人之美可中散大夫守太常少卿勳封如故主者施行

開元十三年十一月十六日

授冀州刺史制

中散大夫守太常少卿上柱國曲江縣開國男張九齡可持節冀州諸軍事冀州刺史散官如故

門下中武將軍前守左金吾衛將軍壽春縣開國男上柱國臣範等才幹卓立智術旁通從事昭於藝能效勞美於官政求瘼之重惟良是屬迭遷中外抑有

常規分牧黎丞咸膺俊選可依前件主者施行

開元十四年五月十四日

授洪州刺史制

門下中散大夫新除冀州刺史上柱國曲江縣開國男張九齡稟秀傑出含章挺生蔚文華以擅奇躬孝友以誠德大中大夫前行尚書都官郎中上柱國始藏縣開國子李成裕體仁以善率禮以訓守官闕以獨茂履忠信而不騫皆人物表才聲方歸妙瞻彼江漢允籍仁明運協歌良之勤式應咨岳之重九齡可使持節都督洪州諸軍事守洪州刺史成裕可使持

節金州諸軍事守金州刺史散官勳封如故主者施行

開元十五年三月十三日

加中大夫制

中散大夫使持節都督洪州諸軍事守洪州刺史

上柱國曲江縣開國男張九齡

右可中大夫

門下朝議大夫守左散騎常侍崔沔等温良恭儉明允篤誠時懋乃官能有從政慶承大禮恩賜通班宜循舊章便增榮級可依前件主者施行

開元十八年四月初八日

轉授桂州刺史兼嶺南按察使制

門下中大夫守洪州刺史使持節都督洪州諸軍事上柱國曲江縣開國男張九齡雅有才幹兼達政理文孝著於四科忠信弘於十室豫章昔蒞見寶劍之衝天合浦今來見明珠之返水宜加優借之寵更委澄清之任可使持節都督桂州諸軍事守桂州刺史散官勳封如故仍充當管經畧使兼嶺南道按察使攝御史中丞借紫金魚袋馳驛赴任主者施行

開元十八年七月三日

守秘書少監制

門下中大夫使持節都督桂州軍事守桂州刺史充當管經畧使兼嶺南道按察使攝御史中丞借紫金魚袋上柱國曲江縣開國男張九齡履行高厲含章挺生學究而精詞麗而則南宮留其奏草西掖籍其綸言自攬轡登塗下車按察五嶺德化而風美九臯聲遠而用聞足以式副虛求允諧僉屬書院綜緝必籍英儒蓬山典校是資宏達宜膺兼副之職俾叶文明之理可守秘書少監兼集賢院學士仍副知院事散官勳封如故

開元十九年三月七日

賜紫敕

敕中大夫守秘書少監集賢院學士副知院事上柱國曲江縣開國男張九齡先任桂州都督借紫金魚袋宜前件賜紫

開元二十年二月二十日

轉工部侍郎制

門下中大夫守秘書少監集賢院學士仍副知院事上柱國曲江縣開國男賜紫金魚袋張九齡識茂而遠體正而清行兼純一詞會風雅密勿累年留心於

西垣澄清萬里樹聲於萬國秘室屬書甫流微婉之譽公車待詔稔聞忠讜之言更著論於會府仍獻納於高門可守尚書工部侍郎餘如故主者施行

開元二十年 月三日

知制誥敕

敕中大夫守尚書工部侍郎集賢院學士仍副知院事上柱國曲江縣開國男賜紫金魚袋張九齡宜知制誥

開元二十年八月二十日

加正議大夫制

門下中大夫守尚書工部侍郎集賢院學士兼知制
誥上柱國曲江縣開國男賜紫金魚袋張九齡才識
通茂藝能該洽或修撰是蕪應加獎命或公方克著
隨所班秩昨汾陰展禮南面覃恩進等升榮抑惟常
序可正議大夫行本官餘如故主者施行

開元二十一年閏三月八日

加檢校中書侍郎制

門下良才敏學允屬疇庸西掖中臺舊難其選正議
大夫行尚書工部侍郎集賢院學士仍副知院事上
柱國曲江縣開國男張九齡朝散大夫中書舍人集

賢院學士侍講陳希烈等先持風望夙推器識知名
日久爲政必聞頃在詞司特推雅誥爰升侍講能識
道文國經代教動多弘益而樞近之職擇人久曠奏
議之地旌賢相望屬應朝典克厭朕心九齡可檢校
中書侍郎希烈可檢校尚書工部侍郎如故

開元二十一年五月二十七日

起復拜相制詞

門下風雲之感必生賢佐廊廟之任爰在柱臣中大
夫守京兆尹上護軍賜紫金魚袋裴耀卿舍元精之
休體度宏遠正議大夫前檢校中書侍郎集賢院學

士仍副知院事上柱國曲江縣開國男賜紫金魚袋
張九齡挺生人之秀器識通明並風望素高人倫是
仰可以叶彼寅亮當茲啓沃幹時待士既資昂實之
和爲國急賢寧惟金革之事耀卿可黃門侍郎同中
書門下平章事弘文館學士散官勳封如故九齡可
起復中書侍郎同中書門下平章事兼修國史餘如
故主者施行

開元二十一年十二月十四日

加銀青光祿大夫中書令制

門下春秋之義尚重卿才王國克植莫先相位用增

其命必正其名中大夫守黃門侍郎同中書門下平
章事弘文館學士賜紫金魚袋上護軍裴耀卿正議
大夫中書侍郎同中書門下平章事兼修國史賜紫
金魚袋上柱國曲江縣開國男張九齡經濟之才式
是百辟正議大夫檢校黃門侍郎賜紫金魚袋上柱
國李林甫泉源之智迪惟前人既樞密載光而親賢
稱首審能群會所溢有孚寧惟是日疇咨固已多年
歷選國鈞繫賴邦禮允清宜命昂臣置之廊廟耀卿
可銀青光祿大夫守中書侍郎九齡可銀青光祿大
夫守中書令集賢院學士知院事修國史勳封如故

林甫可銀青光祿大夫守禮部尚書同中書門下平章事三品勳如故主者施行

開元二十二年五月二十七日

都事 宜一

左司郎中 光

掌書丞相兼光祿大夫守尚書丞相兼賢院學士備國史柱國徐國魯
吏部尚書上柱國武都縣開國伯曷
朝請大夫檢校吏部侍郎上柱國豫
吏部侍郎朝議大夫守尚書左丞賜紫金魚袋挺之
開元二十二年五月二十七日

銀青光祿大夫守中書集賢院學士知書館學士柱國徐國魯張九齡宣

中書侍郎朝議大夫中書舍人內供奉集賢院修撰柱國臣徐客員奉行

銀青光祿大夫守侍中弘文館學士上柱國臣耀卿

黃門侍郎朝請大夫給侍中內供奉臣昱言

制書如右請奉

制付外施行謹言

告銀青光祿大夫守中書令集賢院學士知院

事兼修國史上柱國曲江縣開國男張九齡請

授

制書如右符到奉行

開元二十二年五月二十七日

主事

懷琛

郎中

惲

令史

王烈

書令史姚元

銀青光祿大夫守中書令集賢院學士修國史

上柱國曲江縣開國男張九齡開元二十三年

正月日在中書省考

右

御註詞云允釐大政財成物宜利器無前明心皆照

臨事能斷輸忠必盡况識貫今古思周變通寰宇又安斯人是賴考中上

以前右丞相嵩奏准令京官三品以上考奏裁臣等各得所由司牒報功狀如前

敕旨上考依註餘並中中

龔亮祿太子書室相集賢院學士儻更上柱國徐國公高奉

敕旨如右符到奉行

開元二十三年二月五日

尚書考功

龔亮祿太子守中書令集賢院學士儻更上柱國曲江縣開國男張九齡

牒奉

敕旨如右今以狀牒牒至准

敕故牒

開元二十三年二月五日

今史壽

加紫金光祿大夫制

門下功宣帝載大任所以寄賢道到時雍寵章所以
褒德銀青光祿大夫中書令集賢院學士脩國史上
柱國曲江縣開國男張九齡銀青光祿大夫守禮部
尚書同中書門下三品上柱國李林甫並明識遠圖

資忠履孝自升樞近咸竭至誠每於協契同心則詞
上和氣謹言造膝則忠盡嘉謀既成開濟之美且多
弘益之實屬禮展躬耕功參翼贊宜崇班秩出命式
想勲庸之典並可金紫光祿大夫餘如故主者施行
開元二十三年三月五日

封始興縣開國子食邑四百戶制

金紫光祿大夫中書令集賢院學士脩國史上柱
國曲江縣開國男張九齡

右可進封始興縣開國子食邑四百戶

門下五等之制七命所崇苟非大賢孰起懋賞金紫

光祿大夫侍中弘文館學士裴耀卿等忠規亮節始終不渝或業盛台階且叶贊於三軍或才優國華咸允釐於庶績屬農祥展禮賦并頒恩宜膺誓河之典以紹景風之候可依前件主者施行

開元二十三年三月九日

金紫光祿大夫中書令脩國史始興縣開國子

張九齡開元二十三年在中書省日

御註考詞云今之中書持我大政事之所制不以爲難義之所在必談其奧乃心甚勤文章經國疇以爲讓考中上

克右丞相制

門下燮理陰陽儀形端揆自非人傑孰副僉諧金紫光祿大夫侍中弘文館學士上柱國稜山縣開國男裴耀卿才實國卿望爲人範懷匪躬之節竭奉上之心金紫光祿大夫中書令集賢院學士脩國史上柱國始興縣開國子張九齡器識宏遠文詞博達負經緯之量有謀猷之能自翼贊台階彝倫攸叙直道之心彌固蹇諤之操逾堅並可以儀範百僚緝熙庶績宜處掖垣之任得列官師之長耀卿可守尚書左丞相九齡可尚書右丞相散官勳封如故主者施行

開元二十四年十一月二十七日

金紫光祿大夫尚書右丞相上柱國始興縣開國子張九齡開元二十四年在尚書省日

御註考詞云才稱命代道可濟時自乎獨亮刑於端揆可中上

赴荊州長史制

門下含弘光大是為國體棄瑕錄用乃曰朝經金紫光祿大夫尚書右丞相上柱國始興縣開國子張九齡幸以才術特從任使台衡之地受寄以深端揆之職增榮亦至而不能乃心夙夜與進用旋慕近小人

虧於大德素所引用險詖遂彰令於繆官自貽

可行荊州大都督府長史散官勳封如故即馳驛赴任主者施行

開元二十五年四月二十日

封始興縣伯制

金紫光祿大夫荊州大都督府長史上柱國始興縣開國子張九齡

右可封始興縣開國伯食邑五百戶

門下稽古不訓封建諸侯所以褒崇有德為國之屏金紫光祿大夫荊州大都督府長史上柱國始興縣

開國子張九齡宏才達識資忠履信或當樞近早有
令聞或踐崇班每成政績自中及外既文且武克懋
厥猷不懈于位屬禮備徽稱覃恩庶僚宜加井邑之
封永固山河之業率由典則貽爾子孫稅糧丁役一
皆除免可依前件主者施行

開元二十七年七月二十二日

贈司徒制

正大厦者柱石之力昌帝業者輔相之臣生則保其
雄名歿乃稱其盛德旣終未允於人望加贈寔存乎
國章故中書令張九齡維嶽降神濟川作相開元之

際寅亮成功謹言定其杜稷先覺合於著策求懷賢
彌可謂大臣竹帛猶存樵蘇必禁爰從八命之秩更
進三台之位可贈司徒

按贈司徒舊更爲至德初上皇在蜀思九齡之先
覺下詔去云仍遣使就韶州致祭新史云德宗建
中元年賢九齡風烈贈司徒考之本紀玄宗以天
寶十五年七月庚辰至蜀郡八月癸未朔赦天下
癸巳靈武使至知太子即位丁酉稱上皇詔稱誥
已亥臨軒冊肅宗自庚辰至己亥僅二十日且蒙
塵之餘固無暇贈典神道碑但言發使至韶州弔

祭而已新史蓋據碑也其贈司徒當以建中爲正
趙德麟雜錄云明皇在蜀每思張曲江則泪下遣
使韶州祭之兼齎貨帛以卹其家其誥刻白山屋
壁下

唐故金紫光祿大夫中書令集賢院學士知院事脩
國史尚書右丞相荊州大都督府長史贈太都督上
柱國始興開國伯文獻張公碑銘

銀青光祿大夫廣州刺史兼御史大夫持節克嶺
南節度度支鹽田五府經畧觀察處置等使上柱
國會稽縣開國公徐浩撰

有唐既受命在太宗時有若梁公房鄭公魏衛公李
格于皇天在高宗時有若梁公狄格于上帝在中宗
時有若平陽王敬漢陽王張扶陽王桓南陽王袁博
陵王崔光復宗社在玄宗時有若梁公姚廣平公宋
燕公始興公二張中興王業夫以天柱將傾大盜方
起一振綱目再闡皇猷始興公爲之公諱九齡字子
壽一名博物其先范陽方城人軒轅建國弦孤受氏
良位爲帝師華才稱王佐或相韓五葉或佐漢七貂
代有大賢時稱盛族四代祖諱守禮隋鍾離郡塗山
令曾祖諱君政皇朝韶州別駕終于官舍因爲土著

姓大父諱子胄越州剡縣令烈考諱弘愈新州索盧
丞贈太常卿廣州都督皆蘊德葆光力行未舉地積
高而成嶽雲又蓄而作霖是生我公蔚為人傑弱不
好弄七歲能文居太常府君憂柴毀骨立家庭甘樹
數株連理王公方慶出牧廣州時年十三上書路左
燕公過嶺一見文章並深提拂厚為禮敬弱冠鄉試
進士考功郎沈佺期尤所激揚一舉高第時有下等
謗議上聞中書令李公當代詞宗詔令重試再拔其
萃擢秘書省校書郎應道侔伊呂科對策第二等遷
左拾遺封章直言不協時宰方屬辭病拂衣告歸太

夫人在堂承順左右孝養之至閭里化焉始興北嶺
峭險巉絕大庾南谷坦然平易公乃獻狀詔委開通
曾不浹時行可方執特拜左補闕尋除禮部司勳二
員外郎加朝散大夫超中書舍人封曲江縣男轉太
常少卿出為冀州刺史以庭闈在遠表請罷官改洪
州都督徙桂州都督攝御史中丞嶺南按察兼選補
使黜免貪吏引伸正人任良登能亮賢勞事澤被膏
雨令行祥風屬燕公薨落斯文將喪擢秘書少監集
賢院學士副知院事時屬朋黨頗將排抵窮栖歲除
深不得意渤海王武藝遣我王命思絕其詞中書奏

章不愜上意命公改作援筆立成上甚嘉焉即拜尚書工部侍郎兼知制誥盧從北巡便祠后土命公撰赦對御爲文凡十三紙初無藁草上曰此以卿爲儒學之士不知有王佐之才今日得知當以經術濟朕累歸養上深勉爲遷公弟九皋九章官近州里伏臘賜告給驛歸寧遷中書侍郎丁內憂中使慰問賜絹三百疋奔喪南歸柩先塋毀無圖生啜不容粒白雀黃大號噪庭堊素鳩紫芝巢植廬隴孝之至者將有感乎既卒哭復遣中使起公本官同中書門下平章事口敕敦喻不許爲辭聞命號咷使者逼迫及至

闕下懇請喪手詔有曰不有至孝誰能盡忠墨纒之義不行蒼生之望安在朕以非常用賢曷云常禮哀訴即宜斷表賜甲第一區御馬一疋尋遷中書令集賢學士知院事脩國史初公作相也奏差擇元戎皆取良吏不許入奏罷常奏諸軍在省年支賜諛臣議議事竟不行明年公奏籍田躬耕禮節加金紫光祿大夫進封始興伯每天長節公卿皆進衣服公上千秋金鑑錄五卷述帝王興衰以爲鑒戒公直氣鯁詞有死無二彰善瘴惡見義不回汜陽節度薛王奏前太子索甲二千領上極震怒謂其不臣顧問於公曰

子弄兵罪當咎况元良國本豈可動搖上因涕泣
遂寢其奏武貴妃離間儲君將立其子使中謁者私
於公曰若有廢也必將興焉公遂叱之曰宮闈之言
何得輒出御史大夫李公尚隱大府卿裴伯先不禮
中官皆忤上旨必在殊責公全庇焉幽州節度張守
珪緣降兩蕃斬屈突干將拜侍中涼州節度牛仙客
以省軍用將拜尚書並觸鱗固爭竟不奏詔平盧將
安祿山入朝奏事見於廟堂以為必亂中原固請誅
戮上曰卿無以王衍知石勒此何足言無何用兵為
虜所敗張守珪請按軍令留中不行公諫曰穰苴出

軍必誅在賈孫子行令亦斬宮嬪守珪所奏非虛祿
山不當免死再三懇請上竟不從邊將蓋嘉運等上
策密發將士襲辛酉戎公以為不可妄舉結後代讎
非皇王之化也上不納及羯胡亂常大戎逆命玄
宗思嘆曰自公歿後不復聞忠讜言發中使至韶州
吊祭其先見之明有如此者學究精義文參微旨或
有興託或存諷諫後之作者所宗仰焉上表論事事
多機密入皆削藁人莫得知常以致君堯舜齊衡管
樂行之在我何必古人由是去循資格置採訪使收
拔幽滯引進直言野無遺賢朝無缺政百揆時序庶

工允釐同儕見嫉內寵潛構羅公爲尚書右丞相初
不芥意居之坦然執憲者素公所用劾奏權臣身冠
得罪借以爲累貶荊州長史公三歲爲相萬邦底寧
而善惡大分背憎者衆虐機密發投杼生疑百大吠
聲衆俱皆怒每讀韓非孤憤涕泗沾襟開元二十八
年春請拜掃南歸五月七日遘疾薨於韶州曲江之
私第享年六十二皇上震悼贈荊州大都督有司謚
行曰文獻公越來歲孟冬葬於洪義里武臨原近于
先塋禮也夫人桂陽郡夫人譚氏循州司馬府君誨
之子也淑慎宜家齊莊刑國環珮有節纂組皆功幼

作女儀長爲內則太夫人樂在南國不欲比轅克勤
奉養深得婦禮至德二年十月六日終於私第春秋
七十有七書哭闔門日月綿遠同坐異穴卜兆從宜
公仲第九臯宋襄廣三州刺史採訪節度經畧等使
殿中監李第九章温吉曹等州刺史鴻臚卿腰金拖
紫三虎爲榮立德行政二馮推美嗣子拯居喪以孝
聞立身以行著階在寇逆不受僞官及收復兩京特
制拜朝散大夫太子右贊善大夫孫藏器河南府壽
安尉永保先業克稟義方姪殿中侍御史抗文吏雅
才清公賢操以兄拯早世姪藏器幼孤未見豐碑乃

刊樂石用展猶子之墓庶揚世父之美浩義深知已
眷以文章禮接同人惠蕪甥舅蓮投効德無媿其辭

銘曰

鳳生丹穴 鵬翥南溟 天垂粹氣 地發精靈

傑生我公 揚于王庭 甫稱降神 說表騎星

學究經術 文高宗匠 再掌司言 爰立作相

忠義柱石 謀猷帷帳 王綱允釐 帝采惟亮

退居右揆 出入南荆 玄鶴弭翼 青蠅營營

不瞑猶視 雖歿如生 昭昭令名 千古作程

長慶三年歲次癸卯七月癸丑朔十二日甲子姪孫

嶺南節度判官監察御史裏行仲舉建立 曾孫承

奉即虔州文學敦慶勾當建立 墳塋在西北去此

三百四十有四步 曾姪孫鄉貢進士可復同勾當

立 玄孫鄉貢進士景新 玄孫鄉貢進士景重

歐陽公集古錄跋尾云右張九齡碑按唐書列傳

所載大節多同而時特小異傳云壽六十八而碑

云六十三傳自左補闕改司勳員外郎而碑云遷

禮部傳善張說卒召為秘書少監集賢院學士知

院事碑云副知至後作相遷中書令始云知院事

其載張守珪請誅安祿山事傳云九齡判守珪狀

碑云守珪所請留中不行而公以狀諫然其爲語則畧同碑長慶中立而公薨在開元二十八年至長慶三年實八十四年所傳或有同異而至於年壽官爵其子孫宜不繆當以碑爲是也治平元年

二月十日書

張荊州畫贊并序

呂溫

中書令始興文獻公有唐鯁亮之臣也開元二十二年玄宗春秋高矣謂太平自致頗易天下綜覈稍怠推納浸廣若君子小人摩肩于朝直聲遂寢邪氣始勝中興之業衰焉公於是以身爲身社稷自任抗


危言而無所避秉大節而不可奪小必諫大必諍攀帝檻曆天階犯雷霆之威不羈不止日月幾蝕卻爲分明虎而冠之不敢猛視群賢倚賴天下仰望凜凜乎千載之望矣不虞天將啓幽薊之禍俾姦臣乘農以速致戎許成讒勝聖不能保瓴我公衮衮于侯服身雖遠而諫愈切道既塞而誠彌堅憂而不怨終老南國於戲功業見乎變而其變有一在否則通在泰則窮開元初天子新出艱難久憤荒政樂與群下勵精致理於是乎有否極之變姚宋坐而乘之舉爲時要動中上急天光照身宇宙在手勢若舟楫相得當

附錄
洪流而鼓迅風崇朝千里不足怪也開元末天子倦于勤而安其安高視穆清霽然大滿於是乎有恭極之變荆州起而扶之舉爲時害動喘上欲日與讒黨抗行于交戟之中勢若微陽戰陰衝密雲而吐丹氣歛耀而滅又何難乎所痛者逢十時事一聖踐其跡執其柄而有不可有成有不成况乎差池草茅沈落光耀者復何言哉復何言哉曹谿沙門靈徹雖脫離世務而猶好正直攜其圖像因以示余覩而感之仍作贊曰


唐有棟臣往矣其魏世傳遺像以覺後學德容恢異

天骨峻擢波澄東溟日照泰嶽具瞻崇崇起敬起忠貌與神會凜然生風氣縕逆鱗色形匪躬當時曲直如在胸中鯢鱗初脫激海以化羊角中頽摩天下無喜無愠亦如斯畫嗚呼爲臣傲爾夙夜





唐丞相曲江張文獻公文集附錄終



附錄

